



Priska Wolf è da l'idea ch'ils uffants profiteschan da l'instrucziun immersiva. «Ils uffants emprendan dapli ed il linguatg na perdan els mai. I na va per il rumantsch grischun sco tal, mabain per la chapientscha d'auters linguatgs.»



«Jau benevent l'iniziativa e l'engaschi dals scolasts.» Michael Hartmann manegia che uffants flaiVELS vessian era difficultads cun l'englais, e las cifras sajan pli manavel als uffants che geografia cun temas cumplitgads.



«Igl è ina cuntradiziun d'emprender rumantsch grischun en scola e da cuntinuar en la scola professiunala cun talian u englais.» Rica Moser manegia ch'il talian pudessia era esser ina basa per emprender auters linguatgs. «Tge capita cun ils legastenichers?»



Petra Eggenberger è gia arrivada a la saira d'infurmaziun cun ina tenuta negativa. «L'infurmaziun è stada miserabla e nus avain retschavi il cedel memia tard.» L'educatura suletta da linguatg tudestg na sclauda betg il preproject, è dentant in pau sceptica.

FOTOS S. PFIFFNER

Immersion: Vision u allucinazione?

A Vaz sura è l'instrucziun immersiva in tema delicat

DA SIBYLLE PFIFFNER

■ Il cussegl da scola da Vaz sura ha infurmà ier saira davart il preproject d'immersion en scola. L'acquisiziun d'in segund linguatg duai esser ina schanza e porschida per ils uffants. Immersion munta emprender in segund linguatg cun pratitgar quel. Ina vision dals scolasts da Vaz sura è da viver il segund linguatg rumantsch grischun en il rom matematica. Quai duai capitar senza stuair emprender, sco usità, ordador plects en auters linguatgs. L'instrucziun immersiva sa dentant mo vegnir cuntanschida communalmain.

Joos Weber, manader da la scola, è persvadi che l'immersion promova la flexibilitad e creativitat en il patratgar. «Immersion munta sfunsar en in auter linguatg e sa nudar.» Joos Weber agiunta che l'emprim linguatg na vegnia perquai betg a la curta. I sa tractia plitost d'ina cumpetenza equilibrada en dus linguatgs. Il referent Werner Carigiet discorra d'in model da muntogna da glatsch. «Tar l'immersion profiteschan

ils uffants dal segund linguatg rumantsch grischun, quai che na va betg a donn e cust d'in auter linguatg.» L'idea da l'immersion è d'instruir tscherts roms en il linguatg mamma ed auters en in linguatg ester u en il segund linguatg. A Vaz sura fiss quai il rumantsch grischun.

Il pievel na pleda betg exnum per il rg

«Quants uffants èn cunigl d'experiment tar quest preproject? Exact in uffant da la segunda classa sa rumantsch.» Questa frasa deriva d'in genitur sceptic envers las duas lecziuns supplementaras en rg. D'in auter chantun vegn la reproscha ch'ils geniturs ed ils uffants vegnian sut las rodas. «Ils uffants emprendan per la vita e betg per la scola. Cun questa immersion emprendessan ils uffants per la scola.»

Sto esser ch'intgins na realiseschan anc adina betg da tge ch'i sa tracta insumma tar l'immersion. Ils uffants possedan bastanza capacitat intellectuala per emprender plirs linguatgs. Plitost han ils educaturs temas e barrieras cura

ch'i va per acquistar in segund linguatg. Immersion munta chapir e pir lura numnar. Tenor Paul Dosch, inspectur da scola, sa tracta da cuntanscher il plan d'instrucziun, e l'immersion na saja nagin impediment. «Il rom matematica è adattà per l'acquisiziun dal segund linguatg», manegia l'inspectur. Paul Dosch punctuescha ch'ils uffants retschavessian ils pensums en omadus linguatgs. Sin la dumonda, daco che l'instrucziun immersiva na possa betg esser voluntaria, respunda il president da scola Kaspar Jörger: «L'instrucziun d'in linguatg ester è obligatori en l'entir chantun Grischun. E lura na pudain nus betg far in program da giavischs per mintga uffant.» Na manegia el betg in plan da menu per ils geniturs?

Rumantsch sco clav da linguatgs

«Na fissi betg pli prudent da ponderar ina giada, sche l'englais na fiss betg pli adattà sco segund linguatg?» Ina dumonda giustifitgada, sch'ins ponderescha tge impurtanza che l'englais ha ozendi. Tuttina na vai betg per dominar il rumantsch grischun, mabain per

gudagnar la clav da linguatgs. Rg è ina buna basa per emprender englais, talian, portugais ed auters linguatgs. Babilonias da linguatgs èn sclausas. La finamira da l'immersion è era d'augmentar il nivel cun resursas ch'ils uffants han fatg.

Sin l'entir mund vegn stimà tranter 60% e 75% umans bilings. Il rumantsch grischun vegniss pia nizzegia sco vehichel e betg sco frain dal vehichel. «Umans bilings èn pli attents e sensibels che tals che san perfetg in linguatg», manegia Werner Carigiet. «Tar la bilinguitad resta l'areal dals plects il medem. Sulet ch'il chaun survegn ina outra parita tar il pled «dog», «chien», «cane» u «Hund». Quai munta flexibilitad en il patratgar tar il medem pled.

«Era nus essan abels d'emprender»

Tenor intgins geniturs haja il cedel d'infurmaziun gia fatg ir els sin la palma. Las duas lecziuns supplementaras hajan irrità bain inqualin. Cura che la scolasta Tina Liesch ha agiuntà las duas lecziuns da matematica per rg, è la glisch pir ida si. Chapavel ch'intgins

eran plain ravgia gia avant la saira d'infurmaziun. Ina pitschna mancanza da comunicaziun. Suentar lungas discussiuns è la finala crudada la dumonda, sch'ins na pudessi betg introducir l'immersion en in rom music sco per exempel malegiar. Las rodas en ils tscharvels han entschavì a rotar, a moda positiva. Schebain che la terminologia è pli simpla tar la matematica, manegia Kaspar Jörger avant il «open end»: «En la proxima sesida dal cussegl da scola vegnin nus a resguardar l'atmosfera durant il referat, vossas temas e voss dubis envers il project. En mintga cas reponderain nus anc ina giada la situaziun.»

Sco quai ch'il cussegl da scola è abel d'emprender, vegnan bain era ils geniturs ad avrir in pau dapli l'orizont. I va per il futur dals uffants, per ina schanza unica en la vita e betg per la focuziun dals problems persunals sin la scola da pli baud. Era il project d'immersion na pretendess betg da discurren rumantsch grischun. U discorra insatgi da la Svizra tudestga a chasa suenter scola tudestg da scrittira? Quai èn dua pèra chalzers.